

EUSKALTZAINDIAREN 75. URTEURRENAREN OSPAKIZUNAREN HASIERA

Bilbon, 1993ko urtarrilaren 29an, arratsaldeko lauretan, egoitzako hitzaldi-aretoan, egin du Euskaltzaindiak batzarre irekia, Erakundearen 75. urteurrenaren ospakizunaren iragarpenekoa. Mahaian jarri dira: J. Haritschelhar, euskaltzainburua; J.M. Lekuona, euskaltzainburordea; E. Knörr, idazkaria; J.A. Arana, diruzaina, eta Jose Alberto Pradera, Bizkaiko diputatu nagusia. Bertan ziren: L. Villasante, F. Krutwig, P. Altuna, M. Azkarate. P. Charritton, J.-L. Davant, X. Diharce, A. Irigoyen, E. Larre, T. Peillen, I. Sarasola eta J.M. Satrustegi euskaltzainak; G. Aurrekoetxea, R. Badiola, F. Barrenengoa, B. Gandiaga, X. Gereño, J.L. Goikoetxea, X. Kintana, J.M. Larrarte, J.L. Lizundia, A. Muniategi, J. Oleaga, K. Rotaetxe, P. Uribarren, X. Videgain eta J.J. Zearreta urgazleak.

Leku erreserbatuetan jarri dira: M. Karmen Garmendia, Eusko Jaurlaritzako Hizkuntza Politikarako idazkari nagusia; José M. Rodríguez Ochoa, Nafarroako Gobernuako Hizkuntza Politikarako zuzendari nagusia; Tomas Uribeetxebarria eta M. Jesus Aranburu, Bizkai eta Gipuzkoako Kulturako foru diputatuak; Balendin Lasuen, Eusko Jaurlaritzako Bizkaiko kultur ordezkaria; Aitor Esteban, Bizkaiko Diputazioaren idazkari nagusia; Jokin Apalategi, Eusko Ikaskuntzaren ordezkaria, eta Adrian Celaya, Euskalerrriaren Adiskideen Erret Elkartearen ordezkaria. Kosme Elgezabalen seme-alaba eta ilobak eta Felix Landabururen senitarteko batzuk ere etorri dira.

J. Haritschelhar euskaltzainburuak hasi du ekitaldia. Bere hitzaldian gogoratu du, batez ere, Bizkaiko Diputazioari zor zaion merezimendua, handik sortu baitzen Euskal Akademia sortzeko oihartzuna izan zuen asmoa. Gero, Euskaltzaindiaren historia laburra egin du, bereziki, Arantzazuko biltzarra aipatuz, 50. urteurrenkari, euskara batuarentzat garrantzi handikoa, eta azken hogeita bost urteak eta 1975z gero euskararentzat mugaz honanzko lege-status berria. Azken hitzak Euskaltzaindiaren urteurreneko eginkizunak iragarri ditu hizlariak.

Hitzaldi hau bukatu ondoan, egungo bi omenduen gorazarrezko harlandu bat agertu dute J. Haritschelharrek eta J.A. Praderak. Hona zer dioen harlanduak: “Kosme Elgezabal eta Felix Landaburu Bizkaiko Diputatuak, Euskaltzaindiaren sorrera bultzatzaileak, 75. urtemuga ospakizunean, omenduak izan dira gaur. Bilbon, urtarrilak 29, 1993”.

J.A. Arana Martijak hitz egin du ondoren. Kosme Elgezabal (1877-1953) eta Felix Landaburu (1866-1918) jaunen bizitzaz jardun ondoren, biek aurkezturiko asmoa jasotzen duen agiria irakurri du, bai eta Bizkaiko Diputazioaren 1918ko urtarrilaren 25eko batzarrean gertatua kontatu. Euskaltzaindiaren lehen urratsak gogoratuz eta hasiera hartako euskaltzainen izenak aipatuz bukatu du hitzaldia.

Azkenik, J.A. Pradera jauna mintzatu da. Poza agertu du, Bizkaiko Diputazioak Euskaltzaindiaren sorreran partaidetza handia izan zuelako. Zorion agiankatu dio gero Euskaltzaindiari, urtemuga hau dela-ta, eta etorrikizuneko fruituan bere itxaropena azaldu du.

Jean Haritschelhar
euskaltzainburua

Endrike Knörr
idazkaria